

四庫全書

子部

欽定四庫全書

子部

羣書考索卷五十八

詳校官中書_臣竇汝翼

主事_臣祁韻士覆勘

總校官知縣_臣楊懋珩

校對官中書_臣張九譚

謄錄監生_臣姚元開

欽定四庫全書

羣書考索卷五十八

宋 章如愚 撰

天文門

天文類

自初生民以來世主曷嘗不歷象日月星辰仰則
觀象於天俯則觀象於地天有日月地則有陰陽
天有五星地則有五行天有列宿地則有州域三
光者陰陽之精氣本在地而聖人統理之昔者包

犧氏觀象察法以通神明之德以類萬物之情故
易曰天垂象見吉凶聖人象之黃帝創受河圖始
明休咎星官之書自黃帝始降及高陽乃命南正
重司天北正黎司地爰及帝嚳亦式序三辰唐虞
則羲和繼軌夏則昆吾紹德年代綿邈文籍靡傳
至於商之巫咸周之史佚格言遺記于今不朽其諸
侯之史則魯有梓慎晉有卜偃鄭有裨竈宋有子韋
齊有甘德楚有唐昧趙有尹臯魏有石申皆掌著天

文各謹圖驗其巫咸甘石之徒後代所宗漢司馬談父子繼為史官著天官書以明天人之道劉向廣洪範災異作皇極論以參往行之事及班固叙漢史司馬續述天文而蔡邕譙周各有撰錄司馬彪采之以繼前志漢之傳天文者則有唐都李尋之倫光武以來則有蘇伯況郎雅光並參伍天文發揚善道後張渾為太史令鑄渾天儀總序星經謂之靈憲在三國時吳之陳卓始列甘石巫咸三家著於篇錄並著占贊唐興太史李淳風

浮屠一行尤稱精博如淳風之法象志一行之覆矩圖
後世未能過也故唐史采其要說而以為天文志王朴
之在五代通於歷數嘗以步日步月步星步法歛四篇
合為歷經故史臣載其遺說而為司天考今以其論日
月者攷之曰有中道月有九行此前漢天文志之說也
中道者黃道也一曰光道九行者黑道二則出於黃道
之北赤道二則出於黃道之南白道二則出於黃道之
西青道二則出於黃道之東此之謂日有中道月有九

行也日有九道並與月同此又鄭康成所用以為注月
令者也月令於春其日甲乙而注則以為春從東道月
令於夏其日丙丁而注則以為夏從赤道月令於秋其
日庚辛而注則以為秋從白道月令於冬其日壬癸而
注則以為冬從黑道季夏之末其日戊巳而注以為四
時之間從黃道此之謂日有九行也至於五代史司天
考所載王朴之說則又曰自古雖有九道之說蓋亦知
而未詳徒有祖述之文而無推步之用今以黃道一周

分為八節一節之中分為九道盡七十二道而使日月無所隱其斜正之勢此王朴所以有九道之法也晉書天文志所載王蕃渾天之法則有曰赤道帶天之絃黃道日之所行也半在黃道之內半在赤道之外與赤道東交於角西交於奎此王蕃所以詳言黃道赤道之卞也若日月之行則正歲凡十二會焉子為元枵丑為星紀寅為析木卯為大火辰為壽星巳為鶉尾午為鶉火未為鶉首申為實沈酉為大梁戌為降婁亥為娵訾此

一歲十二會之次也日月周天則凡三百六十五度四分度之一焉星則循天而左行日月則遡天而右行日行一度一歲一周天月行十二度有奇一月一周天此日月周天之度數也日行太陰則無光月行太陽則能照極南為太陽極北為太陰此又王充論衡太陽太陰之說也日者陽精之宗月者陰精之宗月光生於日之所照魄生於日之所蔽當日則光盈就日則光盡此張衡靈憲生魄生明之說也日出于暘谷浴于咸池拂于

扶桑以至于隅中虞淵者此又淮南子日出日入之說也今自其論星辰者言之則有五星有四宮星有極星有中星又有經星瑞星焉夫所謂五星者何也歲星之屬於東熒惑之屬於南太白之屬於西辰星之屬於北鎮星之屬於中央五星同色百姓寧然五星有贏有縮早出為贏晚出為縮至甘氏太初歷又各不同蓋以星贏縮在前名錄後所見也古歷五星之推亡逆行者至甘氏石氏經則以熒惑方曰為有逆行蓋以周衰之變

遂因以為皆非正行也夫所謂四宮星者何也東宮之星則蒼龍之屬角亢氐房心尾箕之七宿其形如龍故曰蒼龍南宮之星則朱鳥之屬井鬼柳星張翼轸之七星其形如翼鳥故曰朱鳥西宮之星則咸池之屬奎婁胃昂畢觜參有白虎體故曰白虎北宮之星則元武之屬謂斗牛女虛危室壁有龜蛇體故曰元武其所謂北極者北辰也北辰天之中也天運無窮三光迭曜而極星不移故曰居其所而眾星拱之此北極也而又有所

謂南極者焉北極則高於地者三十六度南極則下於地者三十六度故北極之下三十六度常見不沒南極之上三十六度常見不沒此南極北極之別也古者舉中星以正四時春則日中星鳥夏則日永星火秋則宵中星虛冬則日短星昴此堯典之中星也而有月令之中星焉孟春之月日在營室昏參中旦尾中仲春之月日在奎昏弧中旦建星中季春之月日在胃昏七星中旦牽牛中例而推之四時皆然此月令堯典中星之

異也若夫經星者如曰四輔曰華蓋如斗魁所載之六星曰上將曰次將曰貴相司命司中司祿者則名之曰文昌斗魁之下兩相比之六星曰泰階曰中階曰下階者則名之曰三台太微為五帝之坐東壁為圖書之府執法郎官之象其官明堂靈臺之象其物皆經星也故馬續云天文之在圖籍昭昭可知者經星常宿中外官凡百一十八名積數七百八十三星皆有州國宮官物象之類張衡靈憲論曰中外官常明者百有二十四可

名者三百二十為星二千五百微星之數萬有一千二百五十庶物蠢動咸有繫命此之謂也若夫瑞星者如隋志所載一曰景星出於有道之國二曰周伯星所見之國必昌三曰含譽四曰格澤此瑞星之類也然總諸星而觀之北斗者乃七政之樞機陰陽之元本也魁四星為璇璣杓三星為玉衡所謂璇璣玉衡以齊七政者也太史公曰杓攜龍角

東方宿

衡殷南斗魁枕參首斗

為帝車運于中央臨制四海分陽陰建四時均五行移

節度定諸紀皆繫于斗故天官之書首言極星又以北斗為諸星之首此又觀象之所當先也或曰第一曰天樞二曰璇三曰璣四曰權五曰玉衡六曰開陽七曰搖光樞為天璇為地璣為人權為時玉衡為音開陽為律搖光為星石氏乃曰一主天二主地三主火四主水五主土六主木七主金又曰一主秦二主楚三主梁四主吳五主燕六主趙七主齊亦不可不知也常觀馮相氏之職掌十有二歲十有二月十有二辰二十有八星之

位辨其叙事以會天位冬夏致日春秋致月以辨四時之叙保章氏之職掌天星以志星辰日月之變動以辨其吉凶此又觀象之法也雖然魏崔浩嘗攷校漢以來日月薄蝕五星行度并譏前史之失別為魏歷以示高允而允謂漢元年五星聚東井乃漢史之謬案星傳金水二星常附日行冬十月日旦在尾箕昏沒於申南而東井方出於寅北二星何因背日而行是史官欲神其事不復推之於理也及浩考之果如充言乃以前三月

旅於東井而非十月也吁安得斯人而與之言天文哉

中星

聖人南面視四時之中所以候四時以布民政也故堯
命羲和歷象日月星辰敬授人時舜在璿璣玉衡以齊
七政皆謂此也然則天以二十八宿分布四方凡三百
六十五度有奇為日月五星之次舍日行一度為一日
一周天為一歲月行三十日一周天為一月故日月一
歲十二會為四時時有孟仲季仲為分至人君不能以

朝夕察候乎星度也故舉四時之中以驗之曰日中春分也曰日永夏至也曰宵中秋分也曰日短冬至也所謂星鳥者南方之星七為朱鳥體春分則見於南方也所謂星火者東方之星七為蒼龍體夏至前見於南方也所謂星虛者北方之星七為元武體秋分則見於南方也所謂星昴者西方之星七為白虎體冬至則見於南方也鄭康成曰凡記昏明中星者為人君南面而聽天下視時候以授民事也既舉四時之中又昏旦但視

方之列宿則孟季之月與周天之度數從可知也故歷代聖王尚之夏有小正周有時訓秦漢暨唐及宋朝皆有月令所以順天時而督民務也詩曰定之方中作于楚宮又有三星在天在隅在戶之候春秋傳曰啓蟄而郊龍見而雩又曰土功水昏正而栽又曰凡鳥日中而出日中而入此皆視列宿而行國政也歷三代漢唐至于今數千年日行漸遠故中星隨而轉移堯典之中星與月令之中星為不同月令之中星與歷之中星又不

同書於春舉星鳥而月令於仲春則曰昏弧中書於夏
舉星火而月令於仲夏則曰昏亢中書於秋舉星虛而
月令於仲秋則曰昏牽牛中書於冬舉星昴而月令於
仲冬則曰昏東壁中書之中星常在後而月令之中星
常在前故鄭康成之釋禮記則曰月令舉其初朔而尚
書總舉其月之中也豈非與月令為不同乎月令於孟
春昏參中而三統歷於立春則以為昏畢十度中元加
歷於立春則以為昏昴九度中皆不同其為昏參中者

考之餘月之昏旦亦莫不然是月令為歷未嘗同也故
孔穎達之疏禮記則日月令但舉其大畧所以昏明之
星不可以正依歷法也是豈非與歷為不同乎昔元祐
中蘇頌為儀象法要以月令洎唐及本朝所測者合為
四時昏旦中星圖陳祥道為禮書亦併論其月令尚書
中星之異皆此意也雖然月令於餘月之昏旦中皆舉
二十八宿如孟春之參尾中季春之牽牛中孟夏之曰
翼曰婺女季夏之曰火曰奎孟秋之昏畢中季秋之昏

虛中孟冬之旦七星中季冬之旦軫中皆二十八宿也
惟仲春之月日奎昏弧中旦建星中獨非二十八宿者
以弧星近井而建星近斗也石氏星經曰井有二十三
度斗有二十六度以井斗度多其星體廣遠不可的指
其昏旦之中故舉弧建以定之此又不可不知也

分野

天有十二次日月之所躔地有十二辰王侯之所國周
官大司徒辨十有二土十有二壤保章氏以星土辨九

州所封封域皆有分星以觀妖祥蓋九州十二域或係之北斗或係之二十八宿或係之五星則雍主於魁冀主於樞青兗主於璣揚徐主於權荆主於衡梁主於魁陽豫主於搖光此繫之北斗者也星紀吳越也元枵齊也娵訾衛也降婁魯也大梁趙也實沈晉也鶉首秦也鶉火周也鶉尾楚也壽星鄭也大火宋也析木燕也此國之係於二十八宿也壽星之次其州曰兗大火之次其州曰青娵訾之次其州曰并降婁之次其州曰徐大

梁之次其州曰冀實沈之次其州曰益鶉首之次其州曰雍鶉火之次其州曰三河鶉尾之次其州曰荆此州之繫於二十八宿也歲星之主齊吳熒惑之主楚越鎮辰星之主燕趙代此係之五星者也然吳越南而星紀在丑齊東而元枵在子魯東而降婁在戌東西南北相反而相屬何耶先儒以為古者受封之日歲星所在之辰其國屬焉觀春秋傳凡言占相之術以歲星之所在為福故師曠梓慎裨竈之徒以天道在西北而晉不害歲

淫元枵而鄭飢則古之言星紀者未嘗不視歲之所在也梓慎曰陳太皞之虛也鄭祝融之虛也皆火房也衛高陽之虛也其星為大水以陳為火則太皞之木為火母故也以衛為水則高陽水行故也子產曰高辛氏有二子伯曰閼伯季曰實沈遷閼伯於商丘主辰商人是因故辰為商星遷實沈於大夏主參唐人是因故參為晉星然則十二域所主亦若是爾班固曰甲乙海外日月不占而丙丁則江淮海岱也戊巳則中州河濟也庚

辛則華山以西壬癸則常山以北一曰甲主齊乙主東夷丙主楚丁主南夷戊主魏己主韓庚主秦辛主西夷壬主燕趙癸主北夷子主周丑主翼寅主趙卯主鄭辰主邯鄲巳主衛午主秦未主中山申主齊酉主魯戌主吳越亥主燕代此又以方位辨州土也蓋自甘德石申以十二次更配十二分野而分野之次已明自班固取三統歷十二次以配十二野而分野之次益明及費直之說周易蔡邕之月令章句所言頗有先後故陳臯更

言郡國所入之宿度而分野之度數為尤明張衡蔡邕
之在漢則以漢之郡而配十二次者也李淳風之法象
志則以唐之州縣而配十二次者也然唐志所載一行
之論則曰近代諸儒言星土者或以州或以國虞夏秦
漢列國廢置不同周之興也王畿千里及其衰也僅得
河南七縣今天下一統而直以鶉火為周分則疆場舛
矣七國之初地形雌韓而雄魏皆綿亘數州相錯如綉
考雲漢山河之象多者或至十餘宿其後魏徙大梁則

西河合於東井秦拔宜陽而上黨入於輿鬼方戰國未
滅時星家之言屢有明驗今則同在畿甸中矣而或者
猶據漢書地理志推之是守甘石遺術而不知變通之
數也以爲天下山河之象在乎兩戒北戒則自三危積
石負終南地絡之陰東及于太華北抵于常山乃東徇
塞而至于朝鮮是謂北紀所以限戎狄也南戒則自岷
山嶠冢負地絡之陽東及太華南踰江漢乃東徇嶺而
至于閩中是謂南紀所以限蠻夷也故星傳謂北戒爲

胡門南戒為越門河源自北紀之首北與地絡相會分而東流與涇渭濟瀆相為表裏謂之北河河源自南紀之首南與地脉相會分而東流與漢水淮瀆相為表裏謂之南河觀兩河之象與雲漢之始終而分野可知矣

渾天儀

言天者有三家一曰蓋天二曰宣夜三曰渾天蔡邕言宣夜之學絕死師承周髀術數具存考驗天狀惟渾天者近得其情所謂周髀者即蓋天之說也其言天地中

高而四隕日月相隱蔽以為晝夜又云天形南高而北
下日出高故見日入下故隱天之居如倚蓋極在人北
是其證也所謂宣夜者惟漢郝萌記先儒所傳而云天
本無質日月衆星浮生空虛之中其行其止皆須氣焉
晉虞喜因宣夜之說於是而有安天之論虞聳亦祖宣
夜之說於是而有穹天之論吳姚信又以天之體南低
北高於是有昕天之論此皆好奇徇異之說非極數
談天者也蓋宣夜有其名而無其傳周髀有其術而無

其驗惟渾天謂地居中而天周焉日在地上為晝日在
地下為夜雖王仲任據蓋天之說以駁渾儀而葛洪釋
之曰周天之度半覆地上半繞地下故二十八宿半見
半隱天轉如車轂之運晉志載黃帝書曰天在地外水
在天外水浮天而載地者也易之晉坤下離上以證日
出於地明夷之離下坤上以證日入於地需之乾下坎
上此亦天入水中之象也當有何損而謂為不可乎故
歷代所用多用渾天本朝韓顯符渾天法象序曰自伏

義立渾儀測北極高下量日影短長定南北東西觀星
間廣狹則伏羲已有渾儀矣隋志曰唐堯即位義和立
渾儀舜璿璣玉衡以齊七政而璿璣即渾天儀也是知
渾儀者實天地造化之準陰陽歷數之元自古聖帝明
王莫不用是以精詳天象故前漢則有洛下閎渾天儀
東漢則有張衡渾天儀在吳則有王蕃渾天儀在晉則
有陸績渾儀在宋元嘉中則有錢樂之渾天儀唐正觀
則有李淳風渾天儀在開元則有梁令瓚黃道游儀而

其中之最精詳者則漢之張衡唐之李淳風為可考也
張衡之儀以八尺圓體而具天地之象則有內規外規
有南極北極有黃道赤道以至于二十四氣二十八宿
與夫日月五星之屬莫不咸在轉之以漏水告之於靈
臺而星中出沒與天相值若合符節故崔子玉為之銘
曰其數術窮天地制作侔造化范曄云其範圍兩儀天
地无所蘊其靈陸公紀之徒以為推步七曜之道度歷
象昏明之證候校以四八之氣考以刻漏之分占晷景

之往來求形證于事情莫密於此則張衡之渾天為可
考也淳風之儀表裏三重曰六合儀曰三辰儀曰四遊
儀皆儀之別也天經金渾金常璿璣者儀中之規也上
列十日十二辰三百六十五度中著日月五星列宿相
距下為元樞主衡遊以橫筭以觀象而察器者儀之用
也推驗之法本於黃道蓋帶天之中距極南北定而不
易者赤道也視日所照以為光道發歛不時者黃道也
治歷者不難於算平朔而難於定氣差制儀者不難於

規赤道而難於規黃道是以太宗置於凝暉而用以測
候此則淳風之渾儀為可考也漢自張衡渾儀之外而
洛下閎之儀君子亦有取焉晉志曰漢太初洛下閎等
造貞儀以攷歷度揚子雲論渾天亦曰洛下閎營之鮮
于妄人度之耿壽昌象之幾幾乎莫能違也此豈非洛
下閎之可取者乎唐自李淳風之後梁令瓚之黃道游
儀君子亦有取焉唐志曰令瓚以木為游儀使黃道運
行以追列舍之變因二分之一以立黃道以赤道定位

黃道游仰月環白道動與天合簡而易從一行是之乃
奏令瓚所為日道月交皆自然契合於推步尤要此豈
非梁令瓚之可取者乎其他如後漢之銅儀則有以銅
而為儀者矣後魏之鍤儀則有以鍤而為儀者矣宋元
嘉之小儀則曰小渾天李淳風之木渾則曰木渾圖唐
明皇武成殿之水渾天則運以水者也張平子之候風
地動儀則又用之以測地者也若夫曰赤道曰黃道此
其法之不同者也曰單規曰雙規曰雙環規其制之不

同者也蓋至本朝張思訓之渾儀則作於太平興國之中其制則有地軸地輪地足之異有橫輪側輪斜輪之別晝夜長短之刻日月五星之度皆具焉而其機轉之用皆隱於樓中此又踵一行令瓚之遺象者也韓顯符之渾儀則成於大中祥符之間其制則有游規直規之別黃道赤道之分曰窺管曰平準皆其儀之號也曰龍柱曰水泉皆其號之殊也此又本乎淳風一行之遺法者也嘗觀蘇頌上儀象法要於元祐中有曰古人測候

天數其法有二一曰渾天儀二曰銅候儀又按吳王蕃云渾天儀者羲和之舊器又有渾天象者以著天體以布星辰二者以考於天蓋密矣詳此則渾天儀銅候儀之外又有渾天象凡三器也渾天象歷代罕傳其象惟隋書志稱梁秘府有之云元嘉中所造由是言之古人候天具此三器乃能盡妙今惟一法誠恐未得精密古人言天有周髀之術以鉤股法推考天度若通此算術則天數從可知矣唐開元中太史監南宮說等馳往安

南蔡蔚等州測候日景一行以南北日影校量用交股
法算之即此法也雖然一行作大衍歷詔太史測天下
之晷求其地中以為定數其議曰周禮大司徒以土圭
之法測土深日至之景又有五寸謂之地中鄭氏以為
日景於地千里而差一寸南宮說擇河南平地度之大
率五百餘里晷差一寸而舊說謂王畿千里影差一寸
妄矣原古人所以步圭影之意將以節宣和氣輔相物
宜不在於辰次之周徑其所以重歷數之意將以恭授

人時欽若乾象不在於渾蓋之是非若乃述元稽之法
於視聽之所不及則君子當缺而不議也而或者各守
所傳之器以術天體謂渾元可任效而測天象可運算
而闕迭為矛盾誠以為蓋天耶則南方之度漸狹果以
為渾天耶則北方之極浸高此二者蓋渾蓋之家盡智
畢誠未有能通其說也則王仲壬葛稚川區區於異同
之辨何益人倫之化哉凡晷度冬夏不同南北亦異先
儒一以里數齊之遂失其實今更為覆矩圖南自丹穴

北暨幽都每極移一度輒累其差可以稽日食之多少
定晝夜之長短而天下之晷皆叶其數矣唐末邊罔修
歷術服其精粹以為不刊之數也

昭宗

刻漏

周天之星二十有八星星之辰十有二辰之度三十有
奇而十二辰之度三百六十五有奇星辰徇天而左旋
日月五星遡天而右轉日陽也舒而遲故暮而周月陰
也蹙而速故一月而周日月會於辰則為月十有十二

會則為歲歲三百有六旬有六日而日之長短參差不齊於是先王刻箭沃漏以揆之故隋志曰黃帝創觀漏水制器取則以分晝夜則漏刻之制蓋始於黃帝其後因以命官周禮挈壺氏則其職也及攷之鄭氏所注則有曰漏之箭晝夜共百刻冬夏之間有短長焉太史立成法有四十八箭此亦可見周制之大畧也漢興因循古制武帝所用之法二至之後九日而增損一刻建武中興歷稍後天宋浮許淑請更歷法天下初定顧猶未

遑而令甲第六漏品斯載日分百刻率以九日為刻增損視夏歷為踈焉永平紹隆張盛景防以四分法課校弦望術頗施行元和編訢李梵推廣其術歷用四分而官漏之制一仍其舊或時至差二刻以上不與天應迄于和帝永元之十四年未知改作惟霍融待詔太史視考夏歷露章抗議詔刻四十八箭以二十四氣日躔所在泊于黃道去極晷景昏明中星刻于其下隨日南北以為長短始終互起凡一再周而一歲之運畢焉四分

歷法訖定于茲然則是氣之設實為至妙終于魏晉相傳不改故晉陸機則有刻漏賦晉李充孫綽則有刻漏銘梁陸倕則又有刻漏銘唐藝文志則有刻漏經唐歷志則有一行步軌漏術此亦可以攷歷代之大畧也然孔穎達謂浮箭壺內以出刻為準賈公彥謂漏水壺內以設刻為度或浮或沉此其說之異也古今刻漏之法有浮漏有稱漏或浮或稱此其制之異也漢夏賀良則有百二十刻之說宋何承天則有春秋二分晝夜各五

十刻之說梁武帝大同之所改用者則又有百八十刻之說至於陳隋則仍用百刻之制此又其效之不同者也
在天聖中燕肅所上刻漏浮箭之壺為金蓮花則曰蓮花漏
皇祐初舒易簡等所造刻漏以水為權衡增平水壺置于文德殿則為文德殿刻漏
蘇頌之在元祐上儀象法要於渾天儀銅候儀渾天象三器之外又置刻漏四副
一曰浮箭漏二曰稱漏三曰沈箭漏四曰不息漏
使挈壺專掌時刻與儀象互相參考以合天星行度

為正所以驗天數與天運為不差則寒暑之氣候自正也雖然周官挈壺氏曰凡軍事垂壺施之於軍所以嚴警守以至朝夕之禮而常以是為節焉然春官雞人凡國事為期則告之時而齊詩特罪挈壺氏者蓋天子備官挈壺氏掌漏雞人告之諸侯則掌漏告時一於挈壺氏而已此不可不知也

沈存中筆談云古今言刻漏者數十家悉皆踈謬未合天度予占天候景驗儀象考數下漏凡十餘年方

粗見真數成書四卷謂之熙寧晷漏皆非襲蹈前人
之迹其間二事尤微其術可以心得不可以言喻非
深知造筭之理者不能與其微也

歷

聖人作歷大要有三一曰象二曰氣三曰數攷之以日
月星辰之象驗之以陰陽寒暑之氣積之以抄忽毫釐
之數蓋四時寒暑无形而運於下日月星辰有象而見
於上二者常動而不息一有一无出入升降或遲或速

不相為謀其久而不能无差者勢使之然也故為歷者其始未嘗不精察而其後多疎不合亦理之然也不合則屢變其法以求之自古以來歷未嘗同也黃帝作調歷乃命羲和占日常儀占月車區占星泠倫造律呂大撓造甲子隸首作算數容成總斯六術考定氣象建五行察發歛起消息正閏餘歷法之詳蓋肇於此顓帝之歷正以孟春號為歷宗堯歷象日月星辰箕子言九疇而五紀明歷法夏商周迭用三統正朔不同歷亦以異

周室既衰歷官失紀疇人子弟散在諸國於是國各有
歷魯歷其一也漢之歷凡四變自張蒼用顓帝歷武帝
用太初歷而劉歆有三統歷章帝則用元和四分歷其
後劉洪則又有乾象歷此其歷之四變也唐之歷凡八
變高祖則用傅成均戊寅元歷高宗則用李淳風麟德
甲子歷開元則用一行大衍歷代宗則用寶應五紀歷
德宗則用建中正元歷憲宗則用元和觀象歷穆宗則
用長慶宣明歷在景福則又有邊岡崇元歷此其歷

之八變也自漢唐之外在晉則有杜預春秋長歷二元
乾度歷在宋元嘉則有何承天之新歷在元魏則有崔
浩五寅元歷在隋則有皇極歷在周顯德則有王朴欽
天歷然漢之歷莫善於太初蓋鄧平唐都洛下閎之徒
以律起歷其衍起於黃鐘初九而乘之得其數八十一
以為日法以前歷上元太初而推之復得閏逢攝提格
之歲中冬甲子朔旦冬至日月在建星故罷廢尤踈遠
者十有七家至淳于覆驗而太初歷之晦朔弦望皆為

最密日月如合璧五星如連珠此太初歷之所以獨顯
於漢也其他如歆之三統而杜預則以為比諸家最踈
六十餘歲輒增一日班固誤以為志而何承天亦云揚
雄惑歆之說采以為太玄如四分歷則出於圖讖之所
著而漢人馮光等又病其歷元之不正至乾象歷雖鄭
玄以為其法窮幽極微而魏韓翊則以為減斗分太過
其視太初則有間矣唐之歷善於大衍蓋一行專用大
衍之策竊攷其詳本於天地之二中始於冬至之中氣

以合朔至日月之會以日度正周天之數以卦氣定七十二候以中星正二十四氣天數始於一地數始於二合二始以位剛柔天數終於九地數終於十合二終以紀閏餘天數中於五地數中於六合二中以通律歷一策之分十九而章法生一揲之分一十六而節法生以卦當歲以爻當月以策當日而其原皆本於易故唐史臣謂自太初歷至麟德歷有二十三家與天雖相近而未密也至一行密矣其倚數立法固无以易也後世雖

有作者皆依倣而已此大衍之術所以獨顯於唐也其
他如戊寅元歷則以受命之歲而為名而祖孝孫之徒
猶恨其疎闊李淳風之甲子歷雖當時以為精密而後
復雜用以瞿曇之經緯歷若夫徐昂之觀象歷則又无
節章之數至於察歛啓閉之候循用舊法而測驗不合
其視大衍則又有間矣自太初大衍之外而杜預之長
歷王朴之欽天歷為可采也預之言曰天行不息日月
星辰各運其舍皆動物也以新故相涉不得不有毫末

之差積而成多以失弦望晦朔則不得不改憲以從之
易所謂治歷以明時言當順天以求合也李修卜顯依
其論以為乾度歷合日行四分数而微增當時參校以
為特勝預奏行之此其可取者然也朴之言曰為國家
者履端立極必體其元布政考績必因其歲禮動樂舉
必正其朔三農百工必順其時五刑九伐必順其氣庶
政有為必從其日月是以聖人必治歷數包萬象以為
法齊七政以立元測圭箭以候氣明九道以步月交遲

速以推星攷黃道之斜正辨天勢之升降而文蝕詳焉
於是而為欽天歷此其可取者然也至於本朝歷凡十
變在建隆則曰應天在太平興國則曰乾元在咸平則
曰儀天在天聖曰崇天在治平曰明天在熙寧曰奉天
在元祐曰觀天在崇寧曰占天未幾又改曰紀元在紹
興曰統元在慶元曰會元此其大畧也然歷之道大矣
有歷元有歷譜後漢虞恭守訢之議歷有曰建歷之本
必先立元正然後定日法法定然後度周天以定分至

三者有程則歷可成也故黃帝造歷元起於辛卯顓帝
用乙卯虞用戊午夏用丙寅商用甲寅周用丁巳魯用
庚子漢用乙卯武帝用丁丑范曄載於律歷志者為可
考也劉向深明洪範嘗作五紀論總六歷而列是非至
歆復究其微眇推易象春秋作三統歷及譜取尹咸所
校條而奏之為十八家之書曰黃帝五家歷曰顓帝歷
曰夏商周魯歷曰天歷曰大歷曰日月宿歷此其以歷
明者也曰日月行帛圖曰五星行度曰律歷數法曰五

星宿紀曰日晷曰許商杜忠筭術此皆象數之書而歷之流也故亦以歷名之曰帝王諸侯世譜曰古來帝王年譜此以譜名者也蓋譜也者歷叙古帝王授受之次以明三統之序以紀災祥休咎之徵而使作歷者得以考驗故其書與歷並傳今班固載於藝文志者為可考也不特此也唐一行之論則又有十二議焉曰歷本曰中氣曰合朔曰沒滅畧例曰卦候曰卦議曰度議曰躔盈縮畧例曰九道議曰晷漏中星畧例曰月蝕議曰五

星議其外又有步中朔術有步發歛術有步日躔術有步月離術有步軌漏術有步交會術步五星術今載於唐歷志者又可考也抑嘗觀唐藝文志其於律書也不特叙歷代之歷書而首叙歷代之算法如劉向九章重差之算法張邱建之算經劉徽之海島算經其他如曰七曜歷算曰黃鍾算法曰五曹算經纖悉備載而不遺以見其明歷者又不可不先明乎此也歐陽作歷志論邊岡用算巧能馳騁反覆于乘除間由是簡捷超徑等

接之術具而經制遠大衰序之法廢吁歷其可輕議哉
雖然古之論朞數者在大傳則曰凡三百六十當朞之
日是一朞之日數止於三百有六十矣在堯典則曰朞
三百六旬有六日是一朞之數又餘於大傳所言者六
日矣至於杜預長歷又有周天之數凡三百六十有五
度四分度之一為言則一朞之度其所行不足又減於
堯典之三分矣則增損之數其不同者又何歟大傳所
言蓋自其正數而言之堯典所言蓋自其置閏之成數

言之長歷所言蓋自步占之法言之此又論歷者之不可不知也

日蝕議曰使日蝕皆不可以常數求則无以稽歷數之疎密若皆可以常數求則無以知政教之休咎五星議曰五星留速伏見之效表裏盈縮之行皆係之於時而象之於政政有小失則小變不然皇天何以陰隲下民警悟人主哉

地理門

江左經畧中原

晉自元帝植國於江左終晉之世雖未嘗愬然於中原而終不能踰淮而北祖逖之於河南有端緒矣而竟不能以酬其擊楫之素志庾翼之志在滅胡亦少壯矣而不能抗李熊之堅敵褚裒大舉而終以自阻以部將徐翁之敗而自沮商浩北伐而終以不遂元溫雖成關洛之功而枋頭頓挫之後大節遽變亦安望其勵志復仇以混一區宇哉其後劉裕以英雄之才奮然以興復為

已任東滅南燕西取姚秦北圍滑臺以與魏氏爭河洛之地前日諸人所以悉力經畫而不可得者往往次第以平志氣亦雄健矣獨惜其入關之後不能事形勢以張國威英雄豪傑之士於是有得其用心者矣故東還之師未及脫旆而秦隴之變已竊發而不可禦此夏連勃勃所以逆知其不能守也裕之規模盖可知矣是以魏太武一振兵威而青兗司豫之地拱手以歸魏豈非規恢之畧歟以開其後歟更宋五十餘年雖文帝一再

出師以開拓境土隨得隨失終不得而有之嘗觀到彥
之統帥舟師徑趣河洛魏人歛衽而退司寇之地常一
平矣未幾而復失柳元景嘗以襄陽之師克復潼關向
義之徒所在響應關輔之地嘗一平矣又未幾而復失
蓋文帝雖號為有志中原而本无進取之長策幸其事
之速辦而不知其敗之尤速也且魏歛戍之初豈真有
畏心哉特以天時不利而不敢與之較爾王仲德曰胡
虜歛戍北歸必併兵全聚若河水既合將復南來是固

足以知敵人之心而帝莫之聽此彥之所以不能據全
其地也元景始進之初亦事幾之會也固宜精擇主帥
號召英傑以共成響應之勢而帝之所任者乃王元謨
虛誕之徒不閑將畧竟以退怯失利而元景亦不得以
獨進命將出師例以成律指授而先後遲速之機諸將
往往不得以自便闕防纖悉一至於此安得度外之士
以立非常之功乎至如檀道濟以蓋世之威名此正敵人
之所深畏者也帝乃以猜疑畏忌之心使之進退死以

自免及事變不支之際始深悔之見何晚也況當時太武之在魏內則有崔浩高允之徒以為之謀外則有奚行長孫翰之徒以為之將乘其翦滅柔然之餘威震兵南向聲勢所接已足以警服人心於未戰之初矣夫敵人之勢方張而宋之所自為國者乃復若是死恠乎青徐兗豫之地相繼覆歿而不自固也吾嘗觀何承天備邊策曰今日非大田淮泗內實青徐使民有贏儲野有積穀然後一舉蕩夷則不足為也若但欲遣軍追討報

其侵暴則彼必輕騎犇走不肯會戰徒興巨費不損於彼報復之役將遂死已此策之最末者也承天之言最切於用而一不暇講徒欲愜其欲速之心而不為久長之計志於苟得而卒不可得也嘗觀晉宋以來凡植國於北方未有能久者劉淵父子奄有關洛而稱漢雖賴石勒之力未幾而反為石勒所取歷二十有六年而亡石勒據河南而稱趙雖出於張賓之謀未幾而竟為冉閼所取歷三十有二年而亡慕容雋之興燕慕容恪之

功也雖其取中山破青齊畧取關河之地然不二世而
遂并於秦苻堅之興秦王猛之功也雖取洛陽平關東
以據中原之地然肥水既敗之後遂分裂於慕容垂姚
萇之徒而不可禁其餘後梁之呂光北燕之馮跋赫連
勃勃之於夏私自竊據而死可久之長筭是以隨起隨
滅而不自知也語北方之盛者莫如魏然自孝文遷洛
之後亡形已見其後孝明六鎮之變纔起而東西分裂
之禍卒移於高氏宇文亦可見矣然則有志於恢復者

豈宜自沮哉

荆襄形勢

昔諸葛亮勸劉備以取蜀結吳跨有荆益周瑜亦勸孫權分以荊州資劉備以發兵爭蜀還據襄陽以威曹操北方可圖也由是觀之坐制吳楚通西蜀而守襄陽英雄之資而帝王之業也昔荀彧說曹操則曰先取河北南臨荊州諸葛說備則曰跨有荆益魯肅說孫權曰荊州與國鄰接據而有之天下可定及曹操破荊州順江

東下則遣周瑜逆入劉備領荊州牧則躬援甲冑與魯肅呂蒙陸遜輩數十年間以死拒戰而荊州卒為吳有魏不復南渡蜀不敢南下者以不失上流之勢也此豈非荊州之形勢乎孫權初有江南而周瑜呂蒙勸權取襄陽以抗曹操晉羊祜滅吳果自襄陽始元溫之領荊州也決策北征自江陵道襄陽直抵關中進至霸上而還柳元景自襄陽率諸軍據潼關戰于陝下南國之威少振焉苻堅乘陷蜀之勢舉兵寇襄陽則江表之勢固

可憂矣此豈非襄陽之形勢乎嘗聞吳紀涉之言曰自西陵至江都五千七百里疆界雖遠而險要必爭之地不過數四猶人有六尺之軀其護風寒亦數處爾如此則上流所備可得而言矣夫荆湖之地為州者十而其鎮則江陵武昌是也京西道為州者八而其鎮則襄陽是也江西道為州者十而其鎮則九江是也凡畫野分土必據其津塗而扼其喉衿今所謂險要必爭之地不過江陵武昌襄陽九江是矣何以明之江水源於岷山

下夔峽而抵荆楚則江陵為之都會故諸葛亮以謂荆州北據漢沔利盡南海東連吳會西通巴蜀此用武之國也岷冢導漾東流為漢漢沔之上則襄陽為之都會故庾翼以謂襄陽西接益梁與關隴咫尺北去河洛不盈千里方城險峻土沃田良水路通流轉運无滯進可以掃蕩秦趙退可以保據上流故也沅湘衆水合洞庭之波而輸之於江則武昌為之都會故吳常都於此而東晉宋齊梁陳之際號稱盛府者此也豫章西江與鄱

陽之浸浩瀚吞納而匯於湓口則九江為之都會晉人以謂潯陽北撫群蠻西運荆郢亦藩任之要者此也今守江陵則可以開蜀道守襄陽則可以控川陝守武昌九江則可以蔽全吳夫蜀漢吳楚併而為一則東海之守亦固矣

秣陵

建康府

壽州

壽春又舊壽陽縣也今安豐軍

蘄州

蘄春

峽州 夷陵又云西陵狼尾灘及安蜀城

廣陵 今揚州
泗州 郡名臨淮

江陵 今荆南府昔荊州又樂郡南郡公安

九江 今江州又郡名潯陽湓口

武昌 今下郢川又郡名江夏

京口 今鎮江府又丹陽又潤州

合肥 今廬州又云廬江

和州 歷陽濡須塢在無為軍巢縣

舒州

同安皖城皖公山

漢陽

沔又名沔口

郢州富水

隨州

漢東

黃州

齊安

光州

弋陽

徐州

永陽

楚州

淮陰

池州

秋浦

瓜步

真州六合縣

采石

和州對境南岸

姑熟

太平州

江淮形勢

江淮之險天地所以限南北也而長淮之地又天地所以蔽長江也昔立國於南則守江以為家戶備淮以為藩籬是故輕重之權不在江而在淮知有江而不知有淮是未知有重險者也夫江東西東極于海上流江陵歸峽則襄陽隨郢為之藩蔽中流武昌九江則舒蘄光黃為之藩蔽下流建康京口則真陽楚泗廬壽為之藩蔽昔三國時吳不得淮南至晉太康兵出廣陵壽春而吳亡東晉經劉石苻姚之亂長淮以南一彼一此而合

肥壽陽淮陰常為晉氏鎮守至陳宣帝始盡失淮南之地其後賀若弼等自陽廬渡采石京口而陳亡南唐罷把淺之師壽春失守而江北之地遂入于周此淮南之得失係江左之安危也今自淮而東以楚泗廣陵為之表則京口秣陵得以蔽遮自淮而西以壽廬歷陽為之表則建康姑熟得以襟帶江西之鎮莫重於潯陽而舒蘄者潯陽之表也湖北之鎮莫重於武昌而齊安者實武昌之表也愚觀三國六朝之間爭戰攻守嘗從事於

此矣恨其未知所以用之也吳氏自孫策駐足江東而於淮之地則有廬江之守故魏氏雖竊取中土而不能以得吳世率以為守淮之利足以蔽長江也而不知用淮之利以圖進取此吳氏之失也劉宋自劉裕立國於建鄴而於淮之地則有盱眙之蔽故元魏雖有虎視之意而終不能以窺宋世率以為守淮之利足以蔽長江而不知用淮之利以爭中原此劉宋之失也蕭梁自武帝立國於江左雖與元魏交爭於兩淮之間互有勝負

而鍾離之守元英退縮歛衽而不敢爭世之議者又以
為淮右之勢誠足以禦敵人之衝也而不知用淮以為
恢拓之計則其所失殆與孫吳劉氏等耳愚考之孫權
踵孫策之遺緒而无爭衝攻取之才觀孫策晚歲付囑
之語止以自保之能許之而魯肅帷幄之謀亦止為保
守江東之計故廬江之地呂蒙雖守之而合肥之後一
為張遼所敗遂終身不敢以窺魏此長淮之地在吳而
吳不能用也宋文帝紹劉裕之遺業雖有爭戰之意而

无規恢之大志觀王元謨之徒率師進取以經畧中原而欲止圖河洛之地劉興祖徑取河北之策則置而不論故臧質盱眙之守僅免敗缺竟未足多而元嘉之政從是不振卒不能挫元魏虎狼之勢此長淮之地雖在劉宋而劉宋不能用也蕭梁自武帝創有基業初年英武似亦可嘉然自其既有天下之後志氣凋落無復囊括宇宙之志雖席鍾離天險之勢而畧不能用險以挫北軍之鋒元澄之圍鍾離雖以失利而自退元英之圍

鍾離雖以韋叡之救而自解不過僅僅自守耳此長淮之地在梁而梁不能用也今邊之東有淮陰盱眙西有鍾離蘄春西北有襄陽樊城自丹陽而抵廣陵自廣陵而抵淮陰自淮陰而抵盱眙此全淮之右臂也自采石而抵歷陽自歷陽而抵鍾離自鍾離而抵蘄春此全淮之左臂也自武昌齊安而達信陽自江陵而至襄陽此漢沔之闕梁也故淮陰盱眙之城固則自淮而東可以無患鍾離之城固則自淮以西可以獲全至於信陽樊

城之壘全則漢沔以南無敵虞矣雖然豈特自固而已哉王羲之與殷浩書曰保淮之志非復所及莫若還守長江羲之勤告因長江以固大業此言是也至謂捨淮而守江豈不謬哉

江淮襄陽巴蜀

自京口而至秣陵控帶荆陽引輔江湖咫尺淮甸應接梁宋人皆知其為長江之險也自武昌而至於江陵東通吳會西運巴蜀南極湖襄北控關洛人皆知其為荆

湖之險也自涪陵而極於成都土地險塞沃野千里控
渝扼瀘聯接闕隴人皆知其為巴蜀之險也然知有長
江之勢而不知所以為守淮之計則非知江之險者也
徒知有荆湖之勢而不知所以為襄漢之計則非知荆
湖之險者也徒知有巴蜀之勢而不知所以為漢中之
備則非知巴蜀之險者也蓋長淮所以為江浙之藩籬
襄漢所以為荆湖之唇齒漢中又所以為巴蜀之門戶
陳宣帝失淮甸之地而致隋人之禍南唐罷把漢之師

而啓周師之釁蓋棄淮而守江則江左亦難以自立矣
吳人不得襄陽杜預得以成江陵之捷符秦會師沔北
而朱序必欲以嚴城中之守蓋棄襄陽而守荆湖則荆
湖必不能以自固矣曹操既破漢中故蜀人皆無自固
之志姜維退保漢樂二城故鍾會如履無人之墟蓋棄
漢中則巴蜀必不能自存矣惟守江以為家戶備淮以
為藩籬則長江之險可得而保也以荆湖為重鎮以襄
陽為唇齒則荆湖之險可得而固也以巴蜀為要害以

漢中有門戶則巴蜀之險可得而有也昔東晉守合肥
壽陽以為重地故劉石終不能踰淮以圖晉陶侃使元
宣以鎮襄陽故趙人不能越漢沔以取荆蜀以魏延鎮
漢中故魏人不能踰南鄭以謀蜀合歷代之得失而並
觀之則荆襄江淮蜀漢之相為用其效可觀矣昔祖逖
自淮陰進兵以復河南到彥之自淮入泗以平司兗則
在淮之形勢為可用也元溫自江陵以趨霸上柳元景
自襄陽以克潼關則在荆襄之形勢為可用也漢高祖

自南鄭以克三秦諸葛孔明自漢中以震關隴則漢中之形勢為可用也為今之計自淮泗以擣青徐自壽春以收汝潁取財於蜀合軍於陝以遏河隴出師襄陽因糧唐鄧以趨京洛則天下之大勢一矣

夏口

今鄂州三江口江夏縣是也

山陽

楚州

歸州

建平

瓜洲

襄陽

樊城

雍州

襄

岳州

巴陵

巴邱

泗口

今淮陽宿遷縣

濠州

即鍾離

信陽軍

近淮河源又之義陽

江都

豫章

隆興

漢樂

蜀二地域也

東京

梁地

南京

宋

西京

洛陽本朝山陵所在

司

西京之地

充

東京之地

太原


河東路

樊口

在今鄂州武昌縣東

當陽

今荆門軍當陽縣



羣書考索卷五十八

欽定四庫全書

子部

羣書考索卷

五十九
六十

詳校官中書臣竇汝翼

主事臣祁韻士覆勘

總校官知縣臣楊懋珩

校對官中書臣徐步雲

謄錄監生臣楊鸞

欽定四庫全書

羣書考索卷五十九

宋 章如愚 撰

地理門

州郡類

謹按天文分野角亢為韓分一曰鄭 氏房心為宋分
尾箕為燕分 斗為吳分 牛女為越分 虛危為
齊分 室壁為衛分 奎婁為魯分 胃昂畢為趙分
觜參為魏分 井鬼為秦分 柳星張為周分 翼

軫為楚分


角亢星曰壽星宮曰天秤時曰辰州曰充 氐房心星
曰大火宮曰天蠋時曰卯州曰豫 尾箕星曰析木宮
曰人馬時曰寅州曰幽 斗牛星曰星紀宮曰磨蠍時
曰丑州曰揚 女虛危星曰玄枵宮曰寶瓶時曰子州
曰青 室壁星曰娵訾宮曰雙魚時曰亥州曰并 奎
婁星曰降婁宮曰白羊時曰戌州曰徐 胃昂畢星曰
大梁宮曰金牛時曰酉州曰冀 觜參星曰實沈宮曰

陰陽時曰申州曰益 井鬼星曰鶉首宮曰巨蠬時曰
未州曰雍 柳星張星曰鶉火宮曰獅子時曰午州曰
三河 翼軫星曰鶉尾宮曰雙女時曰巳州曰荆

唐天文志曰近代諸儒言星土者或以州或以國虞夏
秦漢郡國廢置不同周之興也王畿千里其衰也僅得
河南七縣今天下一統而直以鶉火為周則疆場舛矣
七國之初地形雌韓而雄魏魏西距高陵盡河東河內
北固漳鄴東分梁宋至於汝南韓據全鄭之地南盡潁

川南陽西達號畧距函谷宜陽北連上黨地皆綿亘數
州相錯如綉考雲漢山河之象多者或至十餘宿其後
魏徙大梁則西河合於東井秦拔宜陽而上黨入於輿
鬼方戰國未滅時星象之言屢有明効今則同在畿甸
之中矣或者猶據漢書地理志推之是守甘石遺術而
不知變通之數也晉志序十二次度數及州郡躔次云
班固以十二次配十二野又魏陳卓更言郡國所入宿
度其言最詳今附次之

說圖野分次辰舍八十二



角亢氐鄭兗州

東郡入角一度

東平任城山陰入角六度

泰山入角六度

濟北陳留入亢五度

濟陰入氐一度

東平入氐七度

房心宋豫州

潁川入房一度

汝南入房二度

沛郡入房四度

梁國入房五度

淮揚入心一度

魯國入心三度

楚國入房四度

尾箕燕幽州

梁州入箕十度

上谷入尾七度

漁陽入尾三度

右北平入尾十度

涿郡入尾十六度

西河上郡北地遼西東入尾十度

渤海入箕一度

樂浪入箕三度

玄菟入箕六度

廣陽入箕九度

斗牛女吳越揚州

九江入斗一度

廬江入斗六度

豫章入斗十度

丹陽入斗十六度

會稽入牛一度

臨淮入牛四度

廣陵入牛八度

泗水入女一度

六安入女六度

虛危齊青州

齊國入虛六度

北海入虛九度

濟南入危一度

樂安入危四度

東萊入危九度

平原入危十一度

淄川入危十四度

室壁衛并州

安定入室一度

天水入室八度

隴西入室四度

酒泉入室十一度

張掖入室十二度

武都入壁一度

金城入壁四度

武威入壁六度

燉煌入壁八度

奎婁胃魯徐州

東海入奎一度

琅琊入奎六度

高密入婁一度

城陽入婁九度

膠東入胃一度

昴畢趙冀州

魏郡入昴一度

鉅鹿入昴三度

常山入昴五度

廣平入昴七度

中山入昴一度

清河入昴九度

信都入昴三度

趙郡入昴八度

安平入昴四度

河間入昴十度

真定入昴十三度

滹參魏益州

廣漢入昴四度

越雋入昴三度

蜀郡入昴一度

犍為入昴三度

牂牁入昴五度

巴郡入參八度

漢中入參九度

益州入參七度

井鬼秦雍州

雲中入井一度

定襄入井八度

鴈門入井十六度

代入井十六度

太原入井二十九度

上黨入輿鬼二度

柳星張周三輔

洪農入柳一度

河南入星三度

河內入井九度

翼軫荆楚

南陽入翼六度

南郡入翼十度

江夏入翼十二度

零陵入翼十一度

桂陽入軫六度

武陵入軫十度

長沙入軫十六度

唐一行山河兩戒說按唐一行天下山河之象存乎兩戒

北戒自三危積石負終南地絡之陰東及太華逾河並雷首底柱王屋太行北抵常山之右乃東循塞垣至濊

貊朝鮮是謂北紀所以限戎狄也

南戒自岷山蟠冢負地絡之陽東及太華連商山熊耳
外方桐柏自上洛南逾江漢攜武當荆山至于衡陽及
東循嶺徼達東甌閩中是謂南紀所以限蠻夷也故星
經謂北戒為胡門南戒為越門

河源自北紀之首循雍州北徼連華陰而地絡相會並
行而東至太行之曲分而東流與涇渭濟瀆相為表裏
謂之北河

江源自南紀之首循梁州南徼達華陽而與地絡相會
並行而東及荆山之陽分而東流與漢水淮瀆相為表
裏謂之南河 故於大象則洪農分陝為西河之會五
服諸侯在焉自陝而西為秦涼北紀山河之曲為晉代
南紀山河為巴蜀皆負險用武之國也 自決而東之
用中岳為成周西距外方大伾北至于濟南至于淮達
鉅野為宋鄭陳蔡河內及濟水之陽為邢衛漢陳濱淮
水之陰為田隨

閩

用文之國也 北紀之東至

北河之北為邢趙 南紀之東至南河之南為荆楚

自北河下流南距岱山為三齊夾右碣石為北燕 自
南河下流北距岱山為鄒魯 南涉江淮為吳越皆負
海之國殖之所自阜也 自河源循塞垣北東及海為
戎狄江源循嶺徼南東及海為蠻越觀兩河之象與雲
漢之所終始而分野可知矣

歷代帝王郡邑

伏羲

陳今陳州

神農

陳一曰曲阜今兗州

黃帝

涿鹿今涿州

少昊

曲阜

顓帝

帝邱今濮州濮陽縣

帝嚳

亳今河南沛縣

唐堯

晉陽今晉州

虞舜

蒲阪今河中永濟

夏

韓今潁昌府陽翟縣

商湯

今偃沛

周

鎬東今永興鎬

秦

咸陽今長安

西漢

咸陽今長安

東漢

洛陽今西京

魏

鄴今相州

吳

初武昌今鄂州後建鄴今建康

蜀

成都

西晉

洛陽

東晉 建康

宋 建康

齊 建康

梁 建康

陳 建康

元魏 初雲中後洛陽

北齊 鄴

後周 長安

隋 長安首山

唐 長安

梁 汴今東京

後唐 汴

晉 汴

漢 汴

周 汴

宋朝 汴中興杭

辨古今州郡區域區域之建肇自古初以迄于今上下數千百載間離合分併增省廢置不勝紜煩故有境土雖同名稱或異為梁一也而有南有大有少焉

今汝州

梁縣為南梁皇都浚儀縣為大梁州韓城縣為少梁為

蔡一也而有新有上有下焉

新蔡上蔡今蔡川縣下蔡

今潁川縣是也

三齊三楚之既別

齊與濟北膠東是為

三齊江陵為南楚彭城為西楚吳為東楚

三蜀三吳之

已殊

三蜀謂蜀都漢高分置廣漢武帝分置犍為三吳

今蘇潤湖州

或取名於列宿則曰營曰嫫

隋置嫫州取

嫫女星之分為名營州亦然

或率循於姓氏則為姚為

蒙

姚州人皆姚姓蒙州亦皆蒙姓

以至地列荆揚方分

陝右

南齊以荊州為陝西蓋比周召分陝之義

青齊沃

壤復號東秦

慕容德初議所都潘聰曰青齊沃壤號曰

東秦

載籍所傳不可不辨

區域之興古別九州西漢

以十三州統治晉分天下為十九州唐分為十道宋朝

分為二十三路

古豫今東京南京曹單亳虢陝及京西路徐滑郢金房
信陽之地

古兗今北京滑濮濟鄆恩德博濱隸滄分乾寧永靜之
地

古青今齊青海濰密登萊及遼東之地

古徐今宿泗滁沂淮揚漣海之地並屬京西南地分河
北東西京東東西路在漢亦兗豫州青徐等州二十九
郡國之地在晉豫兗司等州六郡即古之豫司兗青冀

等州九郡即古之兗徐豫揚州四郡即古之徐青平等州四郡即古之青唐之河南道

古冀今信安保定瀛莫深洺磁相西南盡河之地屬河東河北東西路在漢冀得司隸幽并等州十郡國之地冀參幽州得司隸幽冀等州二十郡在晉即幽司冀平等州列郡在唐冀為河東道冀參古幽為河北道

古雍今華州永興河之西渭之北岷洮西北至瓜沙之地屬鄜延等五路在漢司隸涼并等州十二郡之境在

晉卽司雍秦涼等州諸郡唐之關內道

古梁今疊宕階成鳳商金房及四川除施黔之地屬成都等四路

古荆今施黔黃郢信陽分興國及荆湖以西之地屬荆湖南北路在漢古荆參梁卽司隸荆涼益等九郡之地古雍參梁卽涼州八郡之地在晉荆得荊州五郡之地梁得秦雍梁益荆等州之地在唐梁為劍南道分荆梁為山南道分梁雍為隴右道

古揚州今潮州及福建路浙淮南滁宿亳黃泗漣海之地屬淮南東西江南東西兩浙福建等路在漢即豫荆揚等州八郡國之境在晉即揚州五郡唐之淮南道古揚之南境今廣南東西路漢交州九郡之地晉交廣等州列郡唐之嶺南道

古揚之北境今兩浙江南東西淮南西荆湖南路漢荆揚州十郡國晉荆揚等州列郡唐之江南道

古今地理廣狹禹別九州東漸于海西被于流沙朔南

暨聲教益中國之地方五千里周制九州分七千里至秦分天下為三十六郡與黔中南海桂林上郡為四十四東南至海西洮北漠漢之盛時四履之地東樂浪西燉煌南日南北鴈門西南永昌東西九千里南北方三千里五代承三國之後冠帶之國盡秦漢故地隋之世東南盡海西抵沮洳北距五原唐初分為十道及平高昌拓四鎮比之漢代南北則同東不及而西過之羈縻之地皆受節制宋朝土宇與古齊盛凡使者所部分為二

十三路其四方蕃夷之地唐賈魏公所載凡數百餘國
今列其著聞者又參考傳記以敘其盛衰本末至如西
有江海諸國西北有奄蔡北有骨利幹者北距大海東
北有流鬼不知其地以其不通名貢而无患於中國今
畧不載

辨四瀆河出崑崙江出岷山松州嘉城縣甘松嶺下淮
出唐州桐栢山濟出王屋山今孟州始禹道沅水而為
濟截河南渡東流與河澤故水會又北東入於海兗州

在濟河之間濟發源為名今濟州乃非景也至周置兗州兼得今郡之地而濟水自王莽末入河因同流入海是則濟河之地无濟水矣自後所立皆集舊名兼有濟南如漢之淄濟晉唐之齊州濟北如漢晉之濟州濟陽如漢之曹濮晉唐之曹魏等郡國蓋建置之際未之審也

辨三江自豫章而下入于彭蠡而東至海為南江自蜀岷山至于九江彭蠡以入于海為中江自嶓冢導漾東

流為漢過三澁大別以入于江匯于彭蠡以至于海為
北江自彭蠡以上為二自夏口以上為三下而過秣陵
京口以入于海則不復三矣

辨河源河出崑崙曰劉元鼎常使吐蕃見其源自別館
界來吐蕃之人皆云山在國中今澶州東北蓋秦決而
注魏也

辨九河九河之名徒駭太史馬頰覆釜胡蘇鉤盤鬲津
簡與潔按九域志鬲津徒駭在今瀛州鉤盤太史胡蘇

在今滄州曰篤馬河者即馬頰也在今濟州其他覆釜
簡潔漫不可考當在東光成平鬲縣南北之間以漢許
商之言考之徒駭最北鬲津最南蓋徒駭是河之本道
東分為八齊小白塞之為一今河間弓高以東至平原
鬲津往往有其遺處蓋塞其八枝併使歸於徒駭也

辨江漢汴泗按禹貢浮于淮泗達于河蓋水勢自淮泗
入河必道於汴世謂隋煬帝始通汴入泗非也觀晉王
濬伐吳杜預與之書曰自江入淮逾於泗汴沂河而上

振旅還都則由汴可以入泗吳王夫差開溝通水與晉會于黃池則自江可以至淮

辨伊洛瀍澗伊水出洪農盧氏縣熊耳山東北入洛洛水出洪農上洛縣冢嶺山東北至鞏縣入河瀍水出河南穀城縣潛亭北東南入洛澗水出洪農新安縣東北入洛伊瀍澗三水入洛合流而入河

辨五岳中嵩山在西京東太山在兗南衡山在潭西華山在華北恆山在定州

辨五嶺大庾嶺一名塞上在虔州水明嶺本都龐在道州白芒嶺本吟諸亦在道州臘嶺本騎田在郴州臨源嶺本越在今桂州

辨華山九域圖載疏云華山泗州之際東北曰冀東南曰豫西南曰梁西北曰雍以華山十字分之四隅乃四州也

辨非九州之地伊州在燉煌北大磧之外為戎狄之地非九州之限四州漢時車師前王之庭

庭州在流沙之

西北前漢烏孫之舊壤後漢車師後王之庭
安西都護

府

本龜茲國

南越自嶺而南當唐虞三代為蠻夷之國

是百越之地亦可謂之南越

或云南越之君亦夏禹之

後也按甌越閩越禹後少康庶子所封之地即南非閩

種也故地理志云東南二越其義詳矣或曰自交趾至

于會稽七八百里越雜處各有種姓故知皆非少康後

古謂之雕題

王制曰南方曰雕題

非禹貢職方之地

晉

書隋書並以交廣之地為禹貢揚州之域稽其同略考

其鎮數則禹貢職方皆不及此故列於九州外

太一曰未畫野晉書曰昔者元胎无象太素流形對越在天以為元首則記所謂冬居營窟夏居橧巢飲血茹毛未有絲麻者也及燧人鑽火庖犧氏出震風宗下武炎嗣昌基畫野无聞其歸一揆

神農始有里數皇甫說帝王世紀曰自天地開闢未有經界之制三皇尚矣諸子稱神農之王天下也地東西九十萬里南北八十五萬里

黃帝推分星制天下黃帝受命乃推分星方制萬里畫
壄分州得百里之國萬區易稱首出庶物萬國咸寧

顓頊帝嚳始別九州顓頊之所建帝嚳受之創制九州
統領萬國北至幽陵南暨交趾西導流沙東極蟠木日
月所照莫不底焉是以制萬國而建九州

黃帝方立萬國帝嚳始置九州按孔安國注云冀州帝
都不說境界以餘州所至則可知兗州東南距濟西北
距河青州東北距海西南距岱徐州東至海北至岱南

及於淮揚州北距淮南距海荊州北距荊山南及衡山之陽豫州西南至荊山北距河梁州東距華山之陽西距黑水雍州西距黑水東距河

堯立九州堯遭洪水而天下分絕使禹平水土還為九州如舊制也 晉志云昔在帝堯叶和萬邦制八家為鄰三鄰為朋三朋為里五里為邑十邑為都十都為師州十有二師焉

舜十二州之制舜攝帝位分為十二州故虞書云肇十

有二州注云析冀為幽并析青為營 又東坡指掌圖云堯遭洪水天下分絕使禹平之為九州如帝嚳之制至舜肇十有二州蓋以古冀州南北濶大分衛水為并州分燕以北為幽州以青州越海析遼東之地為營州禹貢九州之制夏氏革命又為九州塗山之會亦云萬國書曰冀州既載濟河惟兗州海岱惟青州海岱及淮惟徐州淮海惟揚州荊及衡陽惟荊州荊河惟豫州華陽黑水惟梁州黑水西河惟雍州 晉志云夏后氏東

漸于海西被于流沙南浮于江而朔南暨聲教章亥所
步莫不率俾會群臣于塗山執玉帛者萬國於是九州
之內作為五服天子之國內五百里甸服百里賦納總
二百里納銍三百里納秸服四百里粟五百里米甸服
外五百里侯服百里采二百里任三百里侯侯服外五
百里綏服三百里揆文教二百里奮武衛綏服外五百
里要服三百里夷二百里蔡要服外五百里荒服三百
里蠻二百里流訖于四海弼成五服五服至于五千里

夏德中微遇有窮之亂少康中興不失舊物自孔甲之後以至於桀諸侯相兼其能存者二千餘國方於塗山十損其七矣

殷商封國晉志曰成湯取桀於焦遷鼎于亳伊摯仲虺之徒大明憲典王者之制爵祿公侯伯子男凡五等天子之田方千里公侯皆方百里伯七十里子男五十里不能五十里不合於天子附於諸侯曰附庸凡四海之內九州州方千里建百里之國三十七十里之國六十

五十里之國百有二十凡二百一十國名山大澤不以
封其餘以為附庸閒田八州州二百一十國天子之縣
內百里之國九七十里之國二十有一五十里之國六
十有三凡九十三國名山大澤不以班其餘以祿士以
為閒田凡九州千七百七十三國天子之元士諸侯之
附庸不與天子百里之內以供官千里之內以為御千
里之外設方伯五國以為屬屬有長十國以為連連有
帥三十國以為卒卒有正二百一十國以為州州有伯

八州八伯五十六正百六十八帥三百三十六長八伯
各以其屬屬於天子之老二人分天下為左右曰二伯
千里之內曰甸千里之外曰采曰流天子使其大夫為
三監監於方伯之國國三人天子之縣內諸侯祿也外
諸侯嗣也

商因夏制漢志曰殷因於夏无所損益晉志曰夏功在
唐堯殷因无所損益夏氏革命又為九州塗山之會
至者萬國四百年間遞相兼并殷湯受命其能存者三

千餘國亦為九州分統天下載祀六百

周并體國經野周既克殷監于二代而損益之定官分

職改禹徐梁二州合於雍青

師古注云省徐州以入青

州并梁州以合雍州

分冀州之地以為幽并 分天下

為九畿方千里曰王畿其外曰侯畿又外曰甸畿又外

曰男畿又外曰采畿又外曰衛畿又外曰蠻畿又外曰

夷畿又外曰鎮畿又外曰藩畿 職方氏掌天下之圖

辨其邦國都鄙四夷八蠻七閩九貉五戎六狄之人

東西曰揚州其山鎮會稽其澤數具區 正南曰荊州
其山鎮衡山其澤數雲夢 河南曰豫州其山鎮華山
其澤數圃田 正東曰青州其山鎮沂山其澤數孟豬
正西曰雍州其山鎮嶽山其澤數弦蒲 東北曰幽
州其山鎮醫無閭其澤數獫狁 河內曰冀州其山鎮
霍山其澤數楊紆 正北曰并州其山鎮恆山其澤數
昭餘祁 周禮注云揚荊豫兗雍冀與禹貢略同青州
則徐地也幽并則青冀之地也无徐梁

春秋列國武王克殷光有天下兄弟之國十有五人姬
姓之國者四十人爵五品而土三等公侯百里伯七十
里子男五十里不滿者為附庸蓋千八百國成王時亦
曰九州屬職方氏其後諸侯相併有千二百國及平王
東遷迄獲麟之末二百四十二年間諸侯征伐更相吞
滅不可勝數而見於春秋者百二十四國蠻夷戎狄不
在其數逮乎下分地理上配天象所定躔次揔標十二
鄭宋晉吳衛秦齊陳楚蔡杞燕 漢志曰至春秋時尚

有數十國五伯迭興總其盟會

師古曰此五伯謂齊桓

宋襄晉文秦穆楚莊也

戰國七雄陵夷至於戰國天下分而為七

師古曰謂秦

韓魏趙燕齊楚七國也

合從連橫經數十年而兵革不

息 通典云初平王時雒邑與宗周

制京也

通封畿東

西長南北短相覆為千里後為諸侯所侵比周之亡七
城而已即河南洛陽新城平陰偃師鞏緱氏是也按七
邑之境西自河南洛陽南自伊闕緱氏東至鞏縣北至

于河

秦置三十六郡秦兼并四海以為周制微弱終為諸侯
所喪故不立尺土之封分天下為郡縣盪滅前聖之苗
裔靡有子遺者矣 始皇初并天下懲忒戰國削罷列
侯分天下為三十六郡

三川 河東 南陽 南郡 九江 章郡 會稽

潁川 碭郡 泗水 薛郡 東郡 琅邪 齊郡

上谷 漁陽 右北平 遼東 遼西

代郡 鉅鹿 邯鄲 上黨 太原 雲中 九原

鴈門 上郡 隴西 北地 漢中 巴郡 蜀郡

黔中 長沙 凡三十五郡與內史為三十六郡也 於

是興師踰江平取百越又置閩中南海桂林象郡凡四

十郡郡一守焉其地則西臨洮而北沙漠東繫南帶皆

臨大海 周平王東遷洛邑以岐豐之地賜秦襄公至

孝公作為咸陽 今咸陽縣 築冀闕徙都之謂秦川亦曰

關中至始皇始并天下分置三十六郡各領縣二萬

戶以上為令減萬戶為長後平百越又置四郡郡置一守一丞兩尉以典之監侍御史掌監諸郡

西漢郡國漢興因秦制度崇恩德行簡易以撫海內至武帝攘却胡越開地斥境南置交趾北置朔方之州兼徐梁幽并夏周之制改雍曰涼改梁曰益凡十三郡置刺史本秦京師為內史分天下作三十六郡漢興以其郡太大稍復開置又立諸侯王國武帝開廣三邊故自高祖增二十六文景各六武帝二十八昭帝一訖於

孝平凡郡國二百三縣邑千三百一十四道三十二侯
國二百四十一地東西九千三百二里南北萬三千三
百六十八里提封田一萬萬四千五百一十三萬六千
四百五頃其一萬萬二百五十二萬八千八百八十有
九頃其邑居道路山川林澤羣不可墾其三千二百二
十九萬九百四十七頃可墾定墾田八百二十七萬五
百三十六頃漢極盛矣漢祖隆興革秦之弊分內史為三
部更置郡國二十有三

桂陽

江夏

豫章

河內

親郡 東漢 楚國 平原 梁國 定襄 泰山

汝南 淮陽 千乘 東萊 燕國 清河 信都

常山 中山 渤海 廣漢 涿郡 合二十三郡三內

史者 河上渭南中地也地理志曰高祖增三十六武帝

改河上渭南中地以為京兆馮翊扶風是為三輔也

文增厥九廣平 城陽 淄川 濟南 膠西 膠東

河間 廬江 衡山 武帝改衡山曰六安景加其四

濟北 濟陰 山陽 北海也 宣改濟北曰東平武帝

開越攘胡初置十七

南海

蒼梧

鬱林

合浦

交趾

九真

日南

朱崖

儋耳

九郡

平西南夷置

牂牁

越雋

沈黎

汶山

犍為

益州

六郡西置

武都郡又分立零陵郡合十七郡

拓土分疆又增十四

弘農

臨淮

西河

朔方

酒泉

陳岳

安定

天水

玄菟

樂浪

廣陵

燉煌

武威

張掖

昭

帝少事又增其一金城

至平帝元治二年凡新置郡國

七十有一與秦四十合一百一十一改雍曰涼改梁曰

益置徐州復夏舊號南置交趾北有朔方凡為十三部

涼 益 荆 揚 青 豫 兗 徐 幽 并 冀

十一州交趾朔方三刺史合十三部

史記云西南夷君

長以十數夜郎滇邛都徙笮都冉駹白馬最大皆巴蜀

西南外蠻夷漢武建元六年唐蒙說上通南夷夜郎司

馬相如亦言西夷邛笮可置郡後平南夷置牂牁郡冉

駹皆震恐請臣置吏乃以邛都為越雋郡笮都為沈黎

郡冉駹為汶山郡廣漢西白馬為武山郡滇為益州郡

又晉志始秦惠王滅蜀置郡以張若為蜀守及始皇
置三十六郡蜀之郡名不改漢初有漢中巴蜀高祖六
年分蜀置廣漢凡為四郡武帝西南夷更置犍為牂牁
越雋益州四郡凡八郡遂置益州統焉益州蓋始此也
又晉志昔周武王封召公於燕及秦滅燕以為漁陽
上谷右北平遼西遼東五郡漢高帝分上谷置涿郡武
帝置十三州幽州依舊名不改以後開東邊置玄菟樂
浪等郡亦皆屬焉又晉涼州志周衰其地為狄秦興

美陽甘泉宮本匈奴鑄金人祀天之處匈奴既失甘泉
又使休屠渾邪王等居涼州之地二王以後地降漢漢
置張掖酒泉燉煌武威金城謂之河西五郡改周之河
州為涼州蓋以地處西方常寒涼也地勢西北斜出南
隔西羌西通西域斷匈奴左臂 通典云昔漢武置朱
崖儋耳二郡昭帝省儋耳置朱崖元帝又罷朱崖以其
阻絕數反云 晉志曰漢興創艾亡秦孤立而敗於是
割軍封疆立爵二等功臣侯者百有餘邑于時民罹秦

項戶口彫敝大侯不過萬家小者五六百戶而尊王子弟大啓九國古者有分土无分民若乃跨州連郡小則十有餘城以戶口為差降畧封疆之遠近所謂分民自漢始也起鴈門以東盡遼陽為燕代常山以南太行左轉渡濟漸于海為齊趙穀泗奄有龜蒙為梁楚東帶江湖薄會稽為荆吳北界淮瀕畧廬衡為淮南波漢之陽亘九嶷為長沙諸侯比境周匝三垂外接胡越天子自三河東郡潁川南陽自江陵以西至巴蜀北至雲

中西至隴西與京師內史凡十五郡 漢異姓八王之

地漢書云昔高祖定天下功臣異姓而王者八國張耳

吳芮彭越黥布臧荼盧綰與兩韓信皆得列土南面稱

孤漢五年以魏故地封彭城越為梁王都定陶

今曹州

封黥布為淮南王都六

今壽州縣

九江廬江衡山豫章

皆屬焉以長沙豫章象郡桂林南海立吳芮為長沙王

都臨湘韓王信初都陽翟上後以信壯武北近鞏雒南

迫宛禁而有淮陽皆天下勁兵處也乃更以太原郡為

韓國徙信以備胡都晉陽

今太原

韓信初王齊後徙封

楚王都下邳

今淮陽

而按本傳不載所封地據楚元王

傳信以反誅分其地為二一以封別王一以封楚張耳

居趙都襄國今邢州

臧荼王燕都薊皆如故地後盧綰

以從征荼有功因以燕地封之

漢吳楚七國漢史高祖六年既廢韓信分其地為二國
以東陽郡鄆郡吳郡五十三縣立劉賈為荊王後以荊
地封吳王濞更以廣陵國屬吳按濞本傳吳有豫章之

地以碭郡薛郡郯郡二十六縣立交為楚王至孫戊嗣國孝又敗分故齊地以膠東封維渠以汶川封賢以膠西封功以濟南封辟光又割趙之河間而以餘故趙地封幽王子遂為王 東漢郡國世祖中興惟官多役煩乃命并合省郡國十縣邑道侯國四百餘所明帝置郡一章帝置郡國二和帝置三安帝入命屬國別領北郡者六又所省縣漸復分置至于孝順九郡國百有五縣邑通侯國置皆无郡名而不復列上中下之目其後有

方鎮史官不錄於地理之書以為方鎮兵伐之事非職
方所掌故也

唐置十五道城理明皇開元二十一年又因十道分山
南江南為東西道增置黔中道又京畿都畿置十五采
訪使如漢刺史之職京畿理西京今長安都畿理洛陽

今西京關內多以京官遙領河南理陳留郡河東理太

原河東河北理魏郡隴西理鄯西平山南東理襄陽山

南西理漢中郡劍南理成都蜀淮南理揚廣陵郡江南

東理吳郡

江南西

理豫章郡

黔中

理黔中郡

嶺南

理南

海郡

及天寶盜起中國用兵而河西隴右不守陷于吐

蕃

自祿山之亂河右暨鄯武疊宕等郡皆没于吐蕃代

宗寶應元年又陷秦渭洮臨廣德元年復陷河蘭岷廓

德宗正元二年陷安西北庭隴右州縣盡矣

河北道

羈縻州突厥之別部及奚契丹靺鞨降胡高麗為府十

四州四十六隸幽州都督安東都護府關內道突厥

回紇党項吐谷渾為府二十九州九十隸靈夏延慶

州都督并單于安北都護府 隴右道突厥回紇吐谷
渾之別部及龜茲于闐焉耆疎勒河西內屬諸胡西域
十六國為府五十一州百九十八隸秦涼林松都督并
安西都護府

江南道蠻為州五十一隸黔州都督府

嶺南道蠻為州九十二隸峯桂邕都督并安南都護府
劔南道羌蠻為州二百六十一隸松茂姚雋黎雅戎千
一百八十

東觀書曰桓帝永興元年鄉三千六百八十

二亭二千四百四十三

晉志云光武投戈之歲在則

耗之辰郡國蕭條并省者八

城陽

淄川

高密

膠

東六安

真定

泗水

廣陽

建武十一年省州牧

復為刺史貢十三人各掌一州明帝置一永昌章帝置

二

城吳郡

和順改作其名有九

和帝置淮北廣陽

順

帝改淮陽為陳

楚為彭城

濟東為東平

臨淮為鍾離

千乘為柴安

信都為安平

天水為漢陽

省朔方刺

史合之於司隸凡十二部

其與西漢不同者司隸校隸

部郡治河南朔方隸於并部而郡國百有八焉省前漢

八置五改舊名七因舊九十六少前漢二也桓靈頗增

於前復置六郡

桓帝置高陽 高平 西陵 靈帝置南陂 番

陽 零陵

東有樂浪南永昌郡四履之盛亦如前漢

云

羣書考索卷五十九